

Broj: 03-02-1151/2024  
Sarajevo, 24.06.2024. godine

**PARLAMENT FEDERACIJE  
BOSNE I HERCEGOVINE**

- **Predstavnički dom -**  
gosp. Dragan Mioković, predsjedavajući
- **Dom naroda -**  
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa članom 172. stav (1) Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i članom 164. stav (1) Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i usvajanja po skraćenom postupku, dostavljam Vam PRIJEDLOG ZAKONA O IZMJENI ZAKONA O POSEBNIM PRAVIMA DOBITNIKA RATNIH PRIZNANJA I ODLIKOVANJA I ČLANOVA NJIHOVIH PORODICA**, koji je utvrdila Vlada Federacije Bosne i Hercegovine na 36. sjednici, održanoj 20.06.2024. godine.

Prijedlog zakona se dostavlja na službenim jezicima i pismima Federacije Bosne i Hercegovine.

S poštovanjem,



Prilog u printanoj i elektronskoj formi (CD):

- Prijedlog zakona na bosanskom jeziku,
- Odredbe zakona koje se mijenjaju,
- Obrazac IFP-DA i
- Zakon o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, br. 70/05, 61/06, 9/10, 90/17 i 29/22) (CD)

**Co: Federalno ministarstvo za pitanja boraca i invalida  
odbrambeno-oslobodilačkog rata  
gosp. Nedžad Lokmić, ministar**

W: predmet

BOSNA I HERCEGOVINA  
FEDERACIJA BOSNE I HERCEGOVINE  
VLADA

PRIJEDLOG

ZAKON  
O IZMJENI ZAKONA O POSEBNIM PRAVIMA DOBITNIKA RATNIH PRIZNANJA I  
ODLIKOVANJA I ČLANOVA NJIHOVIH PORODICA

Sarajevo, juni 2024. godine

## DONOŠENJE ZAKONA PO SKRAĆENOM POSTUPKU

Parlament Federacije Bosne i Hercegovine je na sjednici Predstavničkog doma od 21.12.2021. godine i na sjednici Doma naroda od 25.02.2022. godine proglasio Zakon o izmjenama i dopunama Zakona o penzijskom i invalidskom osiguranju („Službene novine Federacije BiH“, broj: 19/22), te je stoga neophodno izvršiti usklađivanje pojedinih odredbi Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, br. 70/05, 61/06, 9/10, 90/17 i 29/22) sa odredbama Zakona o izmjenama i dopunama Zakona o penzijskom i invalidskom osiguranju koje se odnose na usklađivanje osnovice za utvrđivanje mjesečnih novčanih naknada. Pored navedenog određene izmjene i dopune zakona predložene su na inicijativu predstavnika temeljnih boračkih organizacija AR BiH i HVO na koje je ukazala praktična primjena Zakona.

Imajući u vidu naprijed navedeno, kao i činjenicu da nije u pitanju složena i obimna izmjena zakona, predlažemo da se navedeni zakon donese po skraćenom postupku.

**ZAKON  
O IZMJENI ZAKONA O POSEBNIM PRAVIMA DOBITNIKA RATNIH PRIZNANJA I  
ODLIKOVANJA I ČLANOVA NJIHOVIH PORODICA**

**Član 1.**

U Zakonu o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH", br. 70/05, 61/06, 9/10, 90/17 i 29/22) u članu 5. st. (3), (4) i (5) mijenjaju se i glase:

„(3) Visina osnovice mjesečnog novčanog dodatka usklađivat će se na način kako je regulisano usklađivanje penzija propisom koji reguliše oblast penzijskog i invalidskog osiguranja u Federaciji Bosne i Hercegovine.

(4) Usklađivanje osnovice vršit će se počev od 01.07.2024. godine, o čemu odluku donosi Vlada Federacije Bosne i Hercegovine.

(5) Posljednja usklađena osnovica iz stava (2) ovog člana neće se smanjivati.“

**Član 2.**

Ovaj zakon stupa na snagu narednog dana od dana objavljivanja u „Službenim novinama Federacije BiH“, a primjenjivat će se od 01.07.2024. godine.

**O B R A Z L O Ž E N J E**  
**PRIJEDLOGA ZAKONA O IZMJENAMA**  
**ZAKONA O POSEBNIM PRAVIMA DOBITNIKA RATNIH PRIZNANJA I ODLIKOVANJA I**  
**ČLANOVA NJIHOVIH PORODICA**

## **I - USTAVNI OSNOV ZA DONOŠENJE ZAKONA**

Ustavni osnov za donošenje ovog zakona sadržan je u članu III.2.e), u vezi sa članom III.3.(3), Ustava Federacije Bosne i Hercegovine („Službene novine Federacije BiH“, broj: 1/94), prema kome federalna vlast, kada se radi o zakonima i drugim propisima koji su obavezujući na području cijele Federacije Bosne i Hercegovine, ima pravo utvrđivati politiku i donositi zakone u oblasti socijalne politike.

Dakle, imajući u vidu citiranu ustavnu odredbu, federalna vlast ima pravo utvrđivati politiku i donositi zakone i druge propise koji su obavezujući na području cijele Federacije, svake od propisanih zajedničkih nadležnosti i bez prethodne saglasnosti kantona.

## **II - RAZLOZI ZA DONOŠENJE ZAKONA**

Razlog za donošenje Zakona o izmjenama Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, br. 70/05, 61/06, 9/10, 90/17 i 29/22), je usklađivanje visine osnovica mjesečnog novčanog dodatka na način kako je regulisano usklađivanje penzija propisom koji reguliše oblast penzijskog i invalidskog osiguranja u Federaciji Bosne i Hercegovine.

## **III - POJAŠNJENJE POJEDINIH ODREDBI**

**Članom 1.** - propisano je da će se visina osnovice mjesečnog novčanog dodatka usklađivati na način kako je regulisano usklađivanje penzija propisom koji reguliše oblast penzijskog i invalidskog osiguranja u Federaciji Bosne i Hercegovine, te da se posljednja usklađena osnovica neće smanjivati.

**Članom 2.** - propisano je da ovaj zakon stupa na snagu narednog dana od dana objavljivanja u „Službenim novinama Federacije BiH“, a primjenjivat će se od 01.07.2024. godine.

## **IV - FINANSIJSKA SREDSTVA POTREBNA ZA PROVOĐENJE OVOG ZAKONA**

Za provođenje ovog zakona u Budžetu Federacije Bosne i Hercegovine za 2024. godinu potrebno je obezbjediti dodatna finansijska sredstva.

U Budžetu za 2024. godinu na poziciji 6142 - Tekući transferi pojedincima - za implementaciju Zakona o posebnim pravima dobitnika ratnih priznanja i odlikovanja i članova njihovih porodica, planirana su sredstva u iznosu od 18.077.500,00 KM sa uvećanjem od 3,3% po članu 5. stav

(3) Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“, br. 70/05, 61/06, 9/10, 90/17 i 29/22).

Izmjenama navedenog zakona propisano je da će se visina osnovice mjesečnog novčanog dodatka usklađivati na način kako je regulisano usklađivanje penzija propisom koji reguliše oblast penzijskog i invalidskog osiguranja u Federaciji Bosne i Hercegovine, te da će se usklađivanje iznosa mjesečnih novčanih naknada vršiti od 01.07.2024.godine“.

Za provedbu navedenih izmjena Zakona procijenjen je rast od 6,55% što je za 3,25% veće od planiranog rasta 3,3%. To znači da za 3,25% treba uvećati naknade za period juli-decembar 2024. godine.

Za realizaciju navedenih izmjena Zakona o posebnim pravima dobitnika ratnih priznanja i odlikovanja i članova njihovih porodica potrebno je obezbijediti dodatna finansijska sredstva u Budžetu Federacije BiH u iznosu od 200.000,00 KM.

(„Službene novine Federacije BiH“, br. 70/05, 61/06, 9/10, 90/17 i 29/22)

**Odredbe Zakona o posebnim pravima dobitnika ratnih priznanja i odlikovanja i članova njihovih porodica koje se mijenjaju:**

## **ZAKON**

### **O POSEBNIM PRAVIMA DOBITNIKA RATNIH PRIZNANJA I ODLIKOVANJA I ČLANOVA NJIHOVIH PORODICA**

#### **Član 5.**

Dobitnik ratnog priznanja ili odlikovanja iz člana 2. st. 1. ovog Zakona ima pravo na: mjesečni novčani dodatak uz penziju, mjesečni novčani dodatak uz plaću i mjesečni novčani dodatak uz novčanu naknadu za vrijeme nezaposlenosti, odnosno mjesečni novčani dodatak za vrijeme nezaposlenosti (u daljem tekstu: mjesečni novčani dodatak).

Visina osnovice mjesečnog novčanog dodatka usklađivat će se sa odredbama Zakona o budžetima u Federaciji BiH.

Visina osnovice mjesečnog novčanog dodatka usklađivat će se u visini zbira 50% procenta porasta potrošačkih cijena i 50% procenta porasta realnog bruto društvenog proizvoda u Federaciji Bosne i Hercegovine u prethodnoj godini, a prema podacima Federalnog zavoda za statistiku, a najviše do stope rasta realnog bruto društvenog proizvoda u prethodnoj godini.

Usklađivanje osnovice vršit će se počev od 01.01.2023. godine.

U slučaju negativnog kretanja potrošačkih cijena i realnog bruto društvenog proizvoda u smislu prethodnog stava, osnovica iz stava (2) ovog člana se neće smanjivati.

Mjesečni novčani dodatak iz stava 1. ovog člana iznosi 50% od osnovice, za ratna priznanja ili odlikovanja:

Značka „Zlatni ljiljan“

Orden slobode

Orden heroja oslobodilačkog rata

Orden oslobođenja Orden zlatnog grba sa mačevima

Orden zlatnog ljiljana sa srebrenim vijencem

Medalja za hrabrost

Red hrvatskog trolista

Red bana Jelačića

Red Nikole Šubića Zrinjskog

Red kneza Domagoja s ogrlicom

Medalja pobjeda

Medalja otpora

Medalja za vojne zasluge

Policijska medalja za hrabrost

Zlatna policijska značka – zvijezda.

Mjesečni novčani dodatak iz stava 1. ovog člana za ratna priznanja ili odlikovanja Srebrena policijska zvijezda i Srebreni štit – iznosi 20% od osnovice.

Mjesečni novčani dodatak iz stava 1. ovog člana za ratno priznanje Red hrvatskog pletera – iznosi 10% od osnovice.

Nosioci ratnog priznanja ili odlikovanja koji to priznanje ili odlikovanje nisu dobili u skladu sa odredbama člana 1. i člana 2. stav 1. ovog Zakona, ne mogu koristiti prava prema ovom Zakonu.